

Powšitkowne WOZJEWJENJA

njedźelu, 31. měrca 2019

Duchowny oratorij zaklinči

Lubowarjo duchowneje hudźby smědža so na wosebitu chłóšćenku wjeselić. Po 25 lětach zaklinči zaso oratorij „Israelowa zrudoba a tróšt“ wot Korle Awgusta Kocora. Komponist sam je tež słowa ze Stareho zakonja wupytał. Pod wumělskim nawodom Judith Kubicec spěwaja chóry Lipa, Meja a Serbskeho ludoweho ansambla (SLA) a hraje orchester SLA z hudźbnikami „Sinfonietty“ z Drježdźan. Solisća su Romy Petrick (sopran), Britta Schwarz (alt), Jens-Uwe Mürner (tenor) a komorny spěwar profesor Matthias Henneberg (bas). Dwurěčny tekstowy zešiwk so wšěm poskići. Wšitcy su wutrobnje přeprošeni na předstajeni duchowneho oratorija „Israelowa zrudoba a tróšt“ – sobotu, 6. apryla, w 19 hodź. do Chróšćanskeje cyrkwy a njedźelu, 7. apryla, w 17 hodź. do Drježdźanskeje Křižneje cyrkwy. Twórba zaklinči w orchestralnym wobdźělanju Stefana Malzewa. Předwječorne njedźelne kemše w Chróšćicach budu sobotu, 6. apryla, hodžinu zašo hač hewak, potajkim hižo w 17.30 hodź.

Přiležnosć k swjatej spowědži w Róžeńce

sobotu, 6. apryla farar M.Anders, farar dr. D. Dzikiewicz,
17.00 – 18.00 hodź. farar T. Dawidowski, farar B. Jakubaš

sobotu, 13. apryla farar M.Anders, farar dr. D. Dzikiewicz,
17.00 – 18.00 hodź. farar B. Jakubaš, kapłan dr. J. Buliš

póndźelu, 15. apryla farar M.Anders, farar T. Dawidowski,
18.30 – 19.30 hodź. farar G. Nawka, farar J. Magiera

wutoru, 16. apryla farar M. Anders, farar D. Dzikiewicz,
18.30 – 19.30 hodź. farar dr. M. Kleiner, farar dr. S. Foelz

Přeco sobotu je do Božeje mše za lud a kraj, kotraž so we 8 hodź. zahaji, přiležnosć k swjatej spowědži.

TCM hromadži za Malawi

Hladajo na scěhi tropoweho wichora Idai, kotrehož dla su hoberske kónčiny afriskich krajow Mosambik, Malawi a Simbabwe powodžene, chce Towarstwo Cyrila a Metoda z.t. (TCM) ze swojej akciju „Łužica pomha“ woporam pomhać a prosy za nich wo pjenježne dary. Zwisk do Malawija nawjaza wone přez Christinu Smolinu ze Swinjarnje. Wona je wot 2012 do 2013 a spočatk lěta 2017 w Malawiju jako wučerka a baba skutkowała, tehdy hišće jako rodžena Pólkec z Kulowa. Wona wudźeržuje k rjadnicam dale zwisk. Wone chcedža dary z Łužicy njeposrednje biskopej dale sposředkować, zo by je wón potrebnym rozdźělil. Štóž chcył wurjadnu akciju podpěrać, njech přepokaza swój dar na konto towarstwa pola banki LIGA: Cyrill-Methodius-Verein e.V., IBAN: DE 65 750 90 300 000 828 23 66, hesło: Malawi.

Křižowy puć młodžiny

Serbska dekanatna młodžina budže so bołmončku, 14. apryla w Radworju křižowy puć modlić. Započatk je w 14 hodź. w cyrkwi.

Putnikowanje swójbow

Lětuše putnikowanje swójbow do Róžanta wotměje so njedźelu, 7. apryla. Boža mša, ko-truž budže farar Beno Jakubaš swječić, zahaji so w 9 hodź. w hnadownej cyrkwi. Hesło putnikowanja rěka „Štóž z was je bjez hrěcha, njech přeni čisnje kamjeń!“ (Jan 8,7).

Šulerjo 6. do 8. lětnika přeprašeni

Pod hesłom „TY pokazaš nam puć!“ přeprašuje młodźinske dekanatne dušepastyrstwo wšěch šulerjow 6. do 8. lětnika sobotu, 13. apryla, wot 9 do 14 hodź. do Don Boskoweho domu we Worklecach. Na tutym zarjadowanju smědža wobdźělnicy mjez druhim sakrament wujednanja přijec. Zajimcy njech so prošu hač do wutory, 9. apryla, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóžděho wobdźělnika přinošk, wučinjacy štyri eura.

Póstny wopor dekanatneje młodžiny

Z lětušim póstnym woporom podpěruje dekanatna młodžina ponowjenje domu „Emmaus“ na Kukowskim hrodzišću. Wotpowědne listowe kuwerty su w cyrkwjach wupožene.

Křižerjo a zawěsćenje

Nastupajo zawěsćenje kołowokoło křižerjow je přinošk, kotryž je Katolski Posol k tomu před třomi lěty wozjewił, dale aktualnje pod www.posol.de (tam pod „křižerjo a zawěsćenje“) přistupny. Deleka na tutej stronje je link na tekst w němskej rěči podaty, zdobom pod němskej stronu www.posol.de/deutsch a tam pod „Osterreiter und Versicherung“.

Program k projektej „Swětło pozbudža“

We wobłuku wuměłstwoweho projekta „Swětło pozbudža“ zahaji so tutu njedźelu, 31. měrca, w 10.30 hodź. w tachantskej cyrkwi ewangelska Boža služba k wopominanju zběžka w Budyskim jastwje. Serbskorěčny ekumeniski nyšpor samsny džeń budže w 17 hodź. w Michałskej cyrkwi. Hodžinu pozdžišo wotměje so w Marije-Marcínej cyrkwi pasionska vesper. Hudźbny nawod změje Fabian Kiupel.

Młodžina modli so wutoru, 2. apryla, w 19 hodź. na ekumeniskim nyšporje w cyrkwi Našeje lubeje knjenje křižowy puć. Třeći wječork šule modlenja pod hesłom „Modlić so – ale kak?“ wotměje so na tym dnju wot 19.30 do 21 hodź. w Budyskim klóšterku.

K temje „Posledni křesćenjo – čekanje a wuhnaće z Bliskeho wuchoda“, kolebki křesćanskeho okcidenta, budže pater dr. Andreas Knapp z Lipska srjedu, 3. apryla, na žurli swjateho Bena na Budyskej Tzschirnerowej 12 přednošować. Wón bě so mjez druhim do lěhwa čekancow w Iraku podať a budže sobu wo tym rozprawjeć, čehodla ludžo do Europy čekaja.

Pasionska hudźba zaklinči sobotu, 6. apryla, w 17 hodź. w Marije-Marcínej cyrkwi.

Annegret Seidel z Hamburga na baroknej violinje a cyrkwinski hudźbny direktor Michael Vetter z Budyšina zanjesetaj sonaty k pasionej z Heinricha Ignaza Franza Biberoweje (1644-1704) twórby „Bolosciwy różowc“.

Pasionska vesper wotměje so njedźelu, 7. apryla, we 18 hodź. w Marije-Marcínej cyrkwi. Hudźbny nawod změje cyrkwinski hudźbny direktor Michael Vetter.

Cyłkowny program projekta „Swětło pozbudža“ je pod www.posol.de wozjewjeny.

Tři filmy wo cistercienskach na arte

Telewizijny scelak arte wusyła bołmončku, 14. apryla, w 15.35 hodź. w rjedze třidźelneje dokumentacije wo wotkazanju cistercienskow 50 mjeńšin trajacy film, w kotrymž wěnuje so mjez druhim klóštrej Marijinej hwězdze w Pančicach-Kukowje. Tydžeń do toho, 7. apryla, w 15.20 hodź. zaběra so scelak w přnim dźělu z cistercienskami w Francoskej, w třecim potom z tymi w Italskej. Cyłkownje předstaji wón wulki wliw cistercienskeho rjadu na kulturne wuwice Europy.

Wustajeńca wo naložkach w póstnym a jutrownym času

W Budyskim Serbskim muzeju móža sej zajimcy hač do njedzele, 5. meje, nowu wustajeńcu wo serbskich naložkach w póstnym a jutrownym času wobhladać. Džěci móža ju ze zmysłami dožiwić a so při walkowanju wuspytać a jutrowne jejka debić.

Pytaja kubłarku – tež jako přidružnicu

Radworski Katolski serbski džěcacy dom „Alojs Andricki“ pyta kubłarku abo přidružnicu, kotraž powołanje w běhu štyrjoch lět nawuknje a so wotydženju dwójce na kubłanju w šuli wobdžěli. Tež mužojo su witani. Nadrobniše informacije poda wjednica Andrea Henichowa, telefonowe čisło (03 59 35) 2 07 17.

Pój a pohladaj!

Młodostnym, kotřiž so hłubšo ze žiwjenjom zaběraja – a tych njeje mało –, poskićuje farar Martin Kochalski we wobłuku powołanskeje pastoralki składnosć, so intensiwnišo z tym zaběrać. Hižo wjackróc je pod hesłom „Pój a pohladaj!“ zetkanja přewjedł. Wón zwěšća: „Naši młodostni su zwólniwi, do Boha a do jeho wołanja inwestować.“ Zajimowanym poskićuje duchowny ramik k modlenju, wuměnje a zetkawanju. Přichodny raz budže wot pjatka do soboty, 12. do 13. apryla w klóštrej Marijinej hwězdze, spočinajo we 18 hodź. Dalše tajke zetkanja budu w juniju, awgusće a nowembru, stajnje na hinašim městnje. Přizjewić móža so zajimcy pola fararja Kochalskeho pod čisłom (01 72) 1 44 92 77.

► berufung.bistum-dresden-meissen.de

Swědka wěry dožiwić

Po přikładze japoštołow putnikuje kapucin Fra Elia po wšěm swěće, zo by ludži misionował. Wot 1990 dožiwja na swojim čěle Jězusowy pasion. Swój misioniski centrum ma w Calvi dell'Umbriji w Italskej. Tam hdys a hdys tež putnikow z Italskeje a wšeho swěta přijimuje. Njedzeli, 12. meje, porěči Fra Elia wot 15 do 17 hodź. w propstowskej cyrkwi swjateho Jana Nepomuka w Kamjenicy. Nadrobniše informacije nańdu zajimcy pod www.posol.de.

Předstajenje komedije „Čeplski recept“

Serbska lajska džiwadłowa skupina Chróscicy z.t. předstaji swoju komediju „Čeplski recept“ tutu njedzeli, 31. měrca, w 16.00 hodź. w Šunowskej Fabrikskej hospodze. Wšitcy zajimcy su wutrobnje witani.